

LA USC DI LADINS – VENERDI' 29 MARZO 2019

L'é endò ora de Cistà

La scomenzadiva de la sociazion INOUT vegn prejentèda en domenia da les 20.30 te Oratorie de Poza

Joegn - L'é l'ruà l temp di ronoi, del soreie da d'aisciuda e de la bela sajon; taca a fiorir i prumes fiores de pra e con chisc ence pensiero e ensomesc da parfum e da color per la vacanze da d'istà. Per joegn e joenec de Fascia che vel se passèr n istà de divertiment e amicizia, la sociazion INOUT, en colaborazion coi Comuns e con la Parochies de Fascia, endreza per l secondo an la scomenzadiva de animazion "Cistà". Dai 15 de messèl ai 23 de aost, dal lunesc al vender per sie setemènes, con senta aló da l'Oratorie de Poza, l staff de joegn animatores de l'an passà portarà dant endodanef jehes e ativitèdes dediché chest'outa al tem de la multiculturalità. I joegn dai 12



Ence chest an la sociazion INOUT endreza Cistà per i joegn dai 12 ai 16 egn.

ai 16 egn che tolarà pèrt i podarà fèr ence chest an la "setemèna sa mont", n trekking anter i monc più bie de noscia val, encontres con personajes del mond del sport e che vegn da etres paijes del mond, momenc de reflescion e de festa te bait, al lech e adertura te n ciastel medieval. Sarà workshop olache i joegn podarà se meter a la proa e valorisèr si talenc: da la evoluzioni acrobatiche de la jocoleria a la aventures del cors de soravivenza, da la rezetes de cojina con la giaves e i chef da steiles de Fascia a l'emprovisazion teatrèla, passan per l'èrt e i laboratories con la jent de età che à saeres e tradizions da ge passèr a la neva generazions. Vegnarà programà de setemèna en setemèna la preparazion atletica resservèda ai più sportives e no menciàrà i momenc per fèr i doeres de scola. Via per l'istà vegnarà ence

endreza ativitèdes de enconter e condivizion con autra sociazions e persones de la val per la valorisazion, la cognoscenza e l respet de noscia cultura, del lengaz ladin e de l'ambient maraveous che aon dintornvia.

N develpai particulèr a la istituzions e ai sacotenc sponsor che ne deida a endrezèr la scomenzadiva per ge sporjer ai joegn n istà de relazions positives, de oportunità de crescimonìa, n istà che dalbon Cistà! La iscrizions, fin al numer mascim de 60, se pel les fèr online sul sit www.inoutfassa.com. Per aer maor informazions se pel chiamèr l 331 8424531 o scriver a inoutfassa@gmail.com. L Multi Cistà 2019 vegnarà prejentà ofizialmenter ai joegn e genitores en domenia ai 31 de mèrz da les 20.30 te Oratorie de Poza. (tz)